

皇明經世文編

皇明經世文編卷之二百二十二

華亭

宋徵璧上木 陳子龍臥子

選輯

徐孚遠闇公 何 剛愨人

夜郎楊文驄龍友參閱

聶貞襄集

疏

聶 豹

應詔陳言以弭災異疏

正學備服均徭勵節

臣聞治天下以正風俗得賢才為本仰惟國家之興
百六十餘年矣然而至今人才未振風俗未醇民力

未裕國用未舒。人士微謙遜之節。里巷多攘奪之風。盜賊之竊發無時。災害之薦臻未已。刑雖繁而奸弗戢。官不攝而事弗理者。伊誰之責哉。是皆責在士夫。若曰外士夫以求賢才則賢才何由而得。外賢才以正風俗則風俗何由而始。故欲善今日之風俗。當自今日之士夫始。欲善今日之士夫。當自今日之學校始。學校者。又士夫之所關也。去聖旣遠。學校之政不修。人士類以記誦詞章爲學。方其用心之始。旣不止於毫釐之差。則其中之所行。與夫中之所就。又奚啻

於千里之謬哉。間亦有一二豪傑之士，奮興特立，不爲浮詞蔓說所靡，然一傳衆咻，終不免乎傾排之害。故臣竊謂欲正今日之學校，以養今日之人才，當於科舉學校之中，深加敦本尚實之教，而教之之法，則周禮大司徒之三物，乃其準的也。孟軻氏曰：雖有知慧，不如乘勢；雖有鎡基，不如待時。臣觀祖宗積德已逾百年，以其數則正當禮樂可興之會，而聖非頌詞也陛下

聖神文武受命中興，二三大臣同心一德，以其時考之，又爲能興禮樂之時。臣備員臺屬，待罪闕隙，觀民

省方知其蠱壞之極，而因察識其弊源之所在，是以
輒忘疎昧，妄綴爲四事，以上荅 陛下求言如渴之
意。一曰敦本實以興正學也，二曰清寺田以備賑卹
也，三曰覈官籍以均徭役也，四曰考官餘以勵風節
也。願陛下垂聽而采擇之，臣所謂敦本實以興正學
者，蓋自隋唐以來，專以文詞取士，而尚德之風益微
積至于今，弊也極矣。蓋三代之學，皆所以明人倫也
昔也，明人倫於身心，日用之間，今顧明人倫於口耳
佔俾之餘，五尺童子，率能談天道，而初學之士，操觚

論性命皆疊疊千餘言虛僞枝葉之繁未有甚於此時。太祖高皇帝開創之初姑仍其舊而以科舉取士。然必以禮樂射御書數設科分教。至于諸司職掌貢舉事例又必令有司保舉人才皆由鄉舉里選則其尚實行厭虛文之意已可槩見矣。至憲宗皇帝

則令提學官躬歷各學化導諸生仍置簿考驗其德

令學校中三一

行優文藝贍治事長者列上等簿或有德行而劣于經義或有經義而短於治事者列二等簿經義雖優

等簿具存而師生不知其意止以循故事而已

治事雖長而德行或缺者列三等簿歲課月考循序

而升。非上等不許科貢。則其尚實行厭虛文之意。又
可見矣。臣謂 陛下欲嗣續 祖宗之遺意。釐革時
文之積弊。必須倣周禮大司徒以鄉三物教萬民之
法。而立之教。一曰六德。智仁聖義中和。二曰六行。孝
友睦婣任卹。三曰六藝。禮樂射御書數。三物之外。又
教以經義爲四物焉。一主於格物致知誠意正心。以
至于平天下。凡天下國子府州縣之學。各設行實經
義二齋。行實爲上等。於上等之中。又分爲上上上
中二等。經義爲中等。於中等之中。又分爲中中中

下二等。蓋行實之無下等。行實不得以下等名也。經義之齋無上等。經義學之次也。而亦無下等者。下等不得以入學也。夫教以四物。別以二。則其重本抑末之教。已有端緒。而學校之綱正矣。乃今各學正官。於行實。立上上中二樣簿。考以四物。其六德六行六藝俱優。經義又能通曉者。爲行實。上上等。則大書其名於上上等簿。而填註其行實於其名之下。然人才難得。不必其德行道藝之俱全也。其次六德六行六藝之中。或有其一二。或有其三四。於經

義稍劣者，又或六德六行，或有其一、二，或有其三、四，經義頗通，於六藝稍短者，爲行實益之上、中等，則大書其名於上、中等簿，而填註其實於其名之下，蓋行實益以德行、道藝爲重，雖兼經義，而不甚重乎經義也。然所以必兼乎經義者，以有德者必有言也。經義之益，亦立中、中、中、下二樣簿，能通曉一經，公私能無過犯者，爲經義益之中、中等，則大書其名於中、中等簿，填註其無過犯之實，於其名之下，又或能通曉一經，中懷狡詐，而外加修飾，行止弗端，而未甚敗露者，

爲經義彙之中下等則大書其名於中下等簿填註

如北則雜青希北等者

其有過犯之實於其名之下蓋經義彙雖以明經爲業而亦必兼乎德行也每月各學二教等官分考所知填註于四等簿則以申于學之掌教官諸掌教官又兼考之填註于四等簿類申于若府若州若縣諸提調官國子太學則以申于禮部而奏之于天子以備試問選用諸府州縣提調官則以本學教官所考爲本等脚色又叅詢而兼考之每季以四等簿申于提學官提學官每歲躬歷各學集府州等縣提調

官及教官與諸生員而面考之、先考總行道義、後考經義、苟德行道義、無一足觀、雖有經義、亦不之考矣。初考有善、後卒棄其善者、卽同于無善、而名當降。初考有過、後卒能改過者、卽同於無過、而名當升。以是課策、循言而升、俱限提學官到任三年之內、類造各學四等簿爲冊、呈于巡按。巡按稽實而精覈之、呈于禮部、而其考之之法、只用智仁聖義忠和孝友睦婣任卹禮樂射御書數十八字爲則、有一德者則以一德書、有一行者則以一行書、有一藝者則以一藝書。

有德行與藝之二三四者，亦以漸而實書之，不必別作考語，以混名實，然後係以通某經于所書之下，苟有德行克備，道藝兼高，有司固當即日論薦，而朝廷亦宜厚禮延聘，以登用之，其次亦必升入行實錄者，方許補糧，每年歲貢不必復論其食糧之淺深，入學之先後，惟取其行藝之優者克之，三年大比，取士應試，約以三分爲率，如取九十人進場，行實錄取六十，然開試，各何能別其行實，則中試者經義齋則只取三十焉，行實錄爲先，經義錄爲後，多經義之士後之序，不得以私亂也。若經義錄之中下等者，德行

道藝既無足稱。經義雖優。才華雖富。斷然不與進場。且於學中教養三年。不堪升進。則是見善終于不遷。有過于終不改。便當斥退爲民。方今見行事例。每遇鄉試之年。選命京朝官爲總考。臣謂當於總考官員。差往各省之時。禮部將各省提學官所申四等簿別抄一本。印封完固。限三場畢。揭曉前一日。方許會同同考試官。及監臨監試提調等官。當面開拆。然後以取中硃卷對查。本生墨卷。名字脚色。又以墨卷對同禮部四等簿上名字脚色。亦以三分爲率。如取中式。

舉人九十名，則自第一名至第三十名，必行實錄。上

上等者居之，自第三十一名至第六十名，必行實錄。

詳試但取入解額而已，全不論列

之上中等者居之，自第六十一名至第九十名，方許

各之前後為崇厚也

經義齋中中等者居之，總考官與同考官監臨監試

提調等官，敢以私意易其常序者，皆以受私法論。先

是生員送納三場試卷，與中式小錄揭曉榜文，皆須

各寫某府州縣某生員于其名之下，以為識別。禮

部會試所取進士，所列等亦如鄉試，必先行實錄而後

經義，行實錄得三之二，而經義得三之一焉。吏部

選官亦取禮部簿上脚色以爲高下不在行實。出
身者在內不得爲翰林等官。在外不得爲方面府州
縣等正官。待其德行日新政績日異。然後以次陞進
可也。他日太學之師與提學官及掌教天下之學之
官必皆於行實。出取之。凡此內外等官考滿考績
俱要填寫何處出身字樣以憑查考。其在行實。出
身者。後果忠義顯著。政績卓異。不惟當賞其人。而兼
以是爲儒師提調提學等官之功。亦論輕重而加賞
焉。後有學荒行虧。踪跡敗露者。則不惟當罰其人。而

兼以是爲儒師提調提學等官之罪亦論輕重而行
罰焉。臣謂旣以德行道義教養之。又以行實材學升
進而選用之。而又以是考察之。則天下之士皆知行
檢之當勵。虛詞之不足貴。忠孝材德之士。豈無卓然
出於其間者哉。若謂置四等簿考驗士行。以今日之
儒師考今日之生員。適足以行其好惡奔競之私。而
反開巧僞飾詐之門者。則非矣。方今掌教訓導官員
多是舉人歲貢老生。學術粗淺。日暮途窮。固有枉是
非之公。圖爲錙銖之利者矣。使儒師得人。又何人才

難知之患哉。臣謂凡府學教授。必皆選好進士爲之。州學學正。縣學教諭。亦必擇乙榜舉人之有學識器局者爲之。重其祿以養其廉。優其禮以高其節。將見自重則公。不私則明。知弟子者莫若師。描神寫真。積之歲月。肺肝畢露矣。尚何人才難知之患哉。至於府州縣之考生員。果能精察。亦自難違。憑學中所考脚色爲之本根。審同異之言。以知朋黨之分。偶參伍之驗。以責陳言之實。每歲春冬二季。鄉飲酒。可以詢諸耆老。耆老無隱情也。又有合屬里老諸人。里老諸人

亦可詢也。孝弟著於家庭，譽望隆於鄉曲，爲其事而無其功者，世未之有也。提學官又總而察之本學，教官曰某賢也，通學生員又曰某賢也。府州縣提調等官又皆曰某賢也，則其人始終之必君子也無疑矣。拔十得五，固未敢望，但得一二於十者之中，亦足以爲聖世無窮之助矣。臣伏見 憲宗皇帝朝，江西聘吳汝弼，廣東聘陳獻章，二人雖皆不仕，未究於用，然至今南方之士猶有一二知本領之學者，二子有力焉，然則賢才之有益於國，固不專在於多，而賢才所

以爲國家重者，又豈專在於文哉。今幸見行事例，創興社學，蒙以養正，則異日二塗得人，自當不少。陛下試擇臣言，以四物之教，二塗之設，四等簿之立，自下而上，考校之法，乞揮宸翰，作爲學箴，頒降天下之學，刻爲碑文，豎于明倫堂庭中。如今府州縣官箴之制，與太祖皇帝立隊碑于明倫堂之左，前飭後申，輝光相映，使學官學徒，知所向方，提調提學等官，守若畫一，數年之後，士風民俗，亦或可望其少變也。若謂清寺田以備服卹者，臣考常平法，州縣寺舍歲用

有餘則以歸官賑民之窮餓者。宋儒楊時爲瀏陽。日使行旅之疾苦飢踣於道者。隨所在申縣。縣令寺舍飲食之。是皆前代已試之法也。臣謹按福建一省。總官民田糧計八十四萬九千有奇。內寺觀田糧已計有十二萬八千有奇。夫僧道在四民之中。百分未有一。而僧道所得產業。十分乃有其二。井地不均。異端昌熾。可以永歎而遐思者。臣固未易卒言也。時以僧道既有是田之多。則其斯倉斯箱。飽滿充盈。富不期驕。佚則生淫。飲食男女之欲。多出乎天理人情之

外。褻瀆僭多，不可名言。又乃結交官府，爲敗露之先圖。私買田宅，爲還俗之退計。以致前日所積懸磬一空。一遇官府追徵，均徭上役，便爾舉手無措。則其勢不得不求假于士夫豪富之家矣。士夫豪富之家，乘其有急，要其必從，必欲本少利多。方借與銀，應辦爲僧道者，又不得不投托士夫之家，以爲棲身免難之計。凡僧道田租，一槩包收殆盡。甚者貪饕不息，絕無良心。只要收穀入家，任彼糧差負累，而爲僧道者，命不可堪。則又褻茶齋約，而望他仕宦之門，以爲已歸。

矣。是以在福建巡按監司府州縣等衙門爲僧道田租一事，詞訟文卷如毛如山，敝積竭神不能撲遏而救民之善政理財之善方爲是分奪虧損多矣。臣謹按景泰三年事例，各處寺觀田土每寺觀量存六十畝爲業，其餘撥與小民佃種納糧。又按成化六年事例，令福建僧寺及有寺無僧田土每寺除徵及百畝以下，其多餘田地給與無田小民領種。臣謂二聖茲法至精至當，可以決行而無疑。永行而無弊者也。然而至今不行者，竊恐當時言事之臣徒念寺觀之積

百文 教 亦有此 條

弊一特用計之未詳是以僧道有所籍口假託權倖
膚受讎訴復有所謂士夫之嗜利者立乎其間爲之
擺布是以法泥不行流弊至今間有一二名雖撥與
小民佃種實則俱爲大家所得臣謂宜通查天下寺
觀糧米百畝以上者俱依成化年間事例每寺觀給
田百畝以爲常住僧道修理屋宇香燈茶果之費糧
米百畝以下者俱依景泰年間事例給田六十畝以
爲常住僧道修理屋宇香燈茶果之費其小寺觀糧
米不滿六十畝者俱各併歸大寺觀除住持僧道給

田百畝外，餘僧道查果有真度牒者，每名仍給田一十畝，與爲叁糧，其餘田地俱入于官。每田百畝，責令排年里老結報佃戶一人，或寺觀原管下甲首丁力相應者承種之。該納佃租斛秤等項，俱照僧道前收租穀事例，不得有所增損。其該收租穀，儲于官之別倉。該年秋糧驛傳八分料糧，與夫十年里役均徭等項費用，皆於是乎取給。其所餘者，再不許別項支用。專備賑濟，仍令司府縣管糧官督理之前後收支存留數目，務要每年終申呈巡按衙門以憑查考，以防

侵欺。至於重造黃冊之時，其在寺觀僧道所管，所謂百畝二十畝者，俱以本寺觀僧道立戶。曰一某寺僧某某觀道某田地若干畝，米若干石。僧道所辦一應糧差，只是照其所收田產外，此外糧差皆與無預。其在官所收田糧，則另立社庄爲戶，以備過割不得復以僧道爲名。曰一某社庄收某寺觀田地若干畝，米若干石。夫寺觀田米既除糧差公用必省，因其害而除之，以息爭。因其利而導之，以足國。量其所入，計其所出，截長補短，有剩無欠。而預備倉所積一年之間。

可得粟數萬石。積之數年。八閩之荒可有備矣。伏願
聖明裁之。一則可以養僧道清淨無爲之規。二則可
以免官府逋負追推之擾。三則可以息士夫爭奪之
風。四則可以供國家賑恤之用。今者饑饉薦臻。國用
不足。陛下宵旰亦嘗以是爲慮矣。何乃以有用之
穀粟爲僧道淫慾之資。以裕民之厚利爲豪勢爭奪
之門哉。若所爲覈官籍以均徭役者。臣謹按見行優
免事例。在京文武官員。除里甲正役外。其餘一應雜
泛差役。全戶優免。外官優免事例。皆以品從爲差。載

在令典、不啻詳矣、臣切見今日士夫、一登進士、或以舉人選授一官、便以官戶自鳴、原無產米在戶者、則以無可優免爲恨、乃聽所親厚推收詭寄、少者不下十石、多者三四十石、乃或至于百石、原有產米在戶者、後且收添、又於同姓兄弟、先已別籍異居者、亦各併收入戶、以圖全戶優免、或受其請託、以市恩、或取其津貼、以圖利、又有苞苴富厚、囊橐充盈、多置田產、寄庄別縣、仍以官名立戶、中亦多受詭寄、勢燭者、官府固已聞風免差、勢退者亦能多方攀援、以圖全免、

或一年之內。而免數戶。或十年之內。而免數年。殊不知在縣丁米。只有此數。官戶丁米不差。民戶料差必重。夫王者之政。在于養民。朝廷優恤士夫。以爲民也。顧乃憑籍朝廷優免之厚恩。陰食吾民之膏髓。是誠何心哉。由是民不堪命。逃亡凍餒之災。日痼日甚。而官府剝膚椎髓之禍。日酷日深。故詭寄之令。非不嚴也。以之寄于士夫。則踪跡益秘。而不可復查矣。府縣精明之官。非不多也。以其分在士夫。則亦姑從隱忍。而不復究治矣。臣伏讀諸司職掌。國初貢舉事例。內

一欵略云、凡有司保舉人材到京、仍取本戶丁糧數目、作何營生、及戶內有無什役事故、俱結明白、然後開發送部選用、臣欲微做此意、凡進士登第之初、乙榜舉人受官之始、所書籍貫之下、俱要實報本戶在官男子幾丁、官民米幾石、吏部轉之戶部、類造行之、若府若州若縣官府編排徭役、不拘丁米多寡、只照戶部所降數目、照例優免、其不在戶部所降者、戶上丁米、一切編排、官府私作人情、及士夫受寄田糧、俱以贓論、及其入官俸祿果有餘資、增置田業、收產入

戶內官則當六年考滿之時。外官則當三年考績。九

考滿填註增糧凡何于官評不便此

年考滿之時。俱要各報本戶增收糧米多寡。卽以真

亦是秋食風少哉

註于考滿考績本等脚色之下。其無所增者。則註曰

本戶糧米無所增。吏部轉之戶部。類造行之。若府若

州若縣以爲優免之則。不由戶部所降者。亦不得免

私免者。論罪如前。若然。則由前所報者。必不敢多張

虛數。與本戶丁米。全相互異。由後所報者。必不敢受

人詭寄。圖惟錙銖之利。以易終身貪污之名矣。是不

惟可以禁詭寄。均徭役。而受民以一分之惠。亦可因

是察廉貪。識賢否。而勵士夫以廉靜無求之節者。知人則哲。安民則惠。是亦一道也。惟聖明裁之。若所謂考宮餘以勵風節者。臣聞選舉之法嚴。則士多修於家。而壞於天子之庭。考課之法嚴。則士多壞於家。而修於天子之庭。竊嘆今日之士夫。窮則無正心誠意之學。達則無體國子民之心。方其居官在職。內則有六年考察之法。外則有互相考覈之規。固亦碩鼠畏人。虎豹惜班。修飭忍耐。求以得夫聲譽之隆。而冀躋于清要之路者矣。其或覆蓋不用。肺肝敗露者。

固無所逃乎考覈之公。而自投于廢闕之野矣。又或
愛護官爵。不敢罔爲。托故回家。其間固有出於孝弟
恬退之實。而爲是者矣。然欲盜恬退之美名。爲仕宦
之捷徑。乘時勢之方張。爲作家之巧圖者。其間不少
也。是以此等之人。一到故丘。貪饕狼籍。結納上司。挾
制府縣。交通關節。利己害人。顛倒是非。報復私怨。甚
者欺壓宗族。待尊長如路人。凌奪鄉里。遣子弟爲鷹
犬。其已罷職者。則曰吾官已休矣。守此何爲也。其未
罷職者。則曰吾官猶在也。人將爲何哉。臣伏讀景泰

三年貢舉事例內一欵略云官員罷職委無贓犯重情而才學可用者並聽內外官員指陳實跡荐舉赴京考用臣欲推廣此意凡士夫家食者不論其職之崇卑官之罷否俱令監司府州縣等官察其居家所爲或善或惡皆從實錄密以申于巡按衙門有司畏勢希寵所申不實按察衙門皆得查究糾劾巡按衙門俱加察識定爲考語直以申于吏部吏部兼舉而總察之其未罷職者則以其居家之事跡叅諸居官之政事善果相符歟則不次超用可也惡果相符歟

則卽日罷去可也。二者之間。功過相準。則酌量重輕。以爲進退可也。其已罷職者。丘園之資。果能孝友和睦。清素恬靜。則不可以其前日之失。掩其終身之善。起馮唐於已廢。以發潛德之光可也。惡者則前日雖以罷黜。今日尤當創懲。奪惠卿之官爵。而誅奸諛於旣死。又何不可之有哉。是不惟可以遏其挾制官府。奸貪狼藉之威。而亦可以勵其老當益壯。退思補過之忠者。若然。則天下士夫。自相砥礪。始終進退。不敢有二其心。鄉閭獲表正之功。聖世多完節之臣。豈非

士風之一快哉。惟聖裁之夫。祖宗法度精密正當。初無可議。但行之既久。良法美意。漸失其真。飾法虛文。日趨於弊。以故臣取其關係之所當先者言之。蓋敦本實所以正心。以立王化之本。清寺田所以闢邪以衛王道之原。覈官籍所以厚邦本而培植之於中。考官餘所以正士風而維持之於後。而四者之中。又以學校爲本。或者乃謂方今科舉得人。亦不爲少。何必更爲敦本尚實之教。而後可以得異才以成治哉。臣竊以爲古之所謂才者。曰齊聖廣淵。明允篤誠。

也。曰忠肅共懿。宜慈惠和也。今之所謂才者。曰記誦
詞章也。曰意見談說也。古之致君事業。曰巍巍蕩蕩
也。熙熙皞皞也。今之事君者。亦曰期會簿書。智力把
持而已耳。其與古人致治之本。創治之功。規模器局。
力量才識。相去何啻天壤之不相爲侔耶。故宋大儒
程頤與其兄顥。皆厭棄舉業。而從事于聖賢之學。張
載亦曰。孰若少置意科舉。相與從事于堯舜之域。朱
熹亦曰。後世學校雖存。而所以教之者。不過趨時干
祿之技。其所以勸勉程督之者。又適所以作其躁競。

無恥之心。雖有長材美質。可以入聖賢之域者。往往
反爲俗學頽風。驅誘破壞。而不得有所成就。尚何望
其能致化民成俗之效。如先王之時哉。臣由科舉出
身。歷官御史。忝在士夫之列。今日所言。乃欲少變科
舉之文。以從德行之費。而又歸罪于士夫。是豈操戈
入室者之所爲哉。臣少不知學。長亦同流。入仕以來。
徒爲利祿所驅。作縣有愧于循良。立朝實慚於風紀。
其言真誠。款切自非真僞不能及此。
始知上負天子。下負斯民者。皆臣等不學之故也。

皇明經世文編

終

皇明經世文編卷之二百二十三

萃亭

徐孚遠闇公 夏允彝瑗公

編輯

陳子龍臥子 宋徵璧上木

馮瑞振振仲參閱

翁東涯文集

疏

翁萬達

計處防秋戍邊人馬疏 防秋

國家禦虜兵衛四皆不徹警備也而防秋云者以秋高馬肥水艸有依虜可深入故特加戒嚴耳然往者

罕聞有客兵之調。而亦未嘗有擺兵之說也。近因賊勢益橫。異於曩昔。故徵調之兵多。而擺邊之議起矣。

二者並行。勞費加倍。已甚不貲。使於七月秋臨。塞草

客兵但可暫

茂而始聚。九月秋盡。塞艸枯而漸散。臣猶懼其困而

集以用其銷氣久留則更生

敵也。乃若自夏徂冬。聚而不散。是豈用武之經。而可

繼之道哉。去年虜突宣府。侵駭紫荆。貽憂君父。當

事之臣。自惟臯棘。鏡鑒不遠。敢蹈前愆。顧以國家

惟求免罪不暇謀國

之事。莫大於邊情。不度理勢。而一為身謀。過於懲創。

盜臣常習也

則戒生於此。而禍隱於彼。泥於所可知。而忘其所不

可見。非計之得也。而况去年掣兵在九月之中旬。是誠太早。又疎於偵探。不量留以爲防。致虜長驅。罪安可逭。今年值閏。即所臨之十月。當已是去年之十一月矣。防秋主客官兵。畢竟議掣。則此其肯也。胡人以搶掠爲業。不論春冬。馱芻囊酪。輒肆憑陵。稽之往年。歷歷可數。兵掣之後。安保其必不復來。但謹備之。俾不至深入內地。邊臣即云有臯。猶冀 聖慈。俯垂明白。不以殉軍。臣子苟忠於謀國。亦何至于懲噎而廢餐耶。臣惟客兵調徵去家一二千餘里。主兵擺牆遠

者亦不下三四百餘里。朔風裂肌，饋餉不給，鶉衣野處，龜腹徒延。設有脫巾求請，如唐人之事，則將何以

應之。夫使之不以其時，而散之不繇其舊，雖有與休

慄粟不可測度之恩威，然而竄者逸者，自一而十，十

計者將利共空籍也

而百，百而至于千萬，欲盡置之法，則太苛，欲遂釋其

辜，則啓玩。設又有不忍飢寒，不俟命令，闕然解散，所

損豈其微哉。臣所謂禍隱於不可見者，此也。爲今之

計，合無先將他鎮客兵，及擺邊主兵官軍民壯人等

次第掣放，參將守備等官所部兵馬，各歸本路本城

堡照常防守。宣大二鎮。量將正奇游兵四營官軍分爲兩班。每班二營。各擇賊行緊要地方。輪流駐劄。時常往來巡邏防禦。每月一更。以休息人力。節省行糧。仍差家丁通事夜不收人等。不肯出境遠哨。一聞有警。隨賊向往。互相應援。併力截殺。敢有怠玩及自分彼此。致誤事機者。聽臣叅究重治。山西保定二鎮。亦行各撫鎖官。量留精兵一二枝。一體防禦。其偏頭關迤西臨近黃河一帶。疊砌水牆。鑿穿品坑。以禦套賊。擁衆渡河東侵之患。各鎮合用行糧料草。行各巡撫。

都御史查處支給。倘有不敷。逕自奏請給發接濟。臣又惟掣兵云者。謂掣去異鎮客兵。至于本路各城。僅沿邊官軍。止是不復挨牆擺列而已。邊事有常。自當時時隄備。上年各官思不出此。一經掣放。便自以兵既掣即是故人乘我無備之時安可高枕為已。釋重負。既不遠哨。又不設防。倉卒遇賊。束手無策。重貽邊患。職是之繇。務要安不忘危。靜而思變。一若臨敵。勿自廢弛。庶可以弭變於未萌。而消患於意外矣。

預擬分布人馬以禦虜患疏

分兵防守

臣准巡撫保定都御史蘇祐咨稱。閱視得諸關備采
衆議。倒馬紫荊。最爲緊要。蓋二關山勢。雖稱險絕。中
有河流。山形斜亂。各該隘口。隨險分兵。恐難持久。外

精○於○地○利○之○言○

恃宣大犄角。勢又在人。若夫龍泉之守。外有平刑。故
關之險。連年山西修守。俱有次第。似可無虞。前巡撫
都御史鄭重咨行軍門。要於宣府鎮。摘撥兵馬三千
在舊保安州岔道堡駐劄。專備應援馬水口。大同鎮
摘撥兵馬三千在平刑關駐劄。專備應援吳王口。仍
摘撥別鎮三千在廣昌縣駐劄。專備應援浮圖峪。插

箭嶺等處。但查得舊保安州桃花堡與岔道堡相去馬水口尤近。相應改移駐劄。應援。又查得白羊口與撫屬地方相近。計去京師路實咫尺。勢尤緊要。亦當添兵以防意外之患。該前巡撫都御史鄭重題行該兵部咨行順天巡撫都御史郭宗臯查處。無容再議。除具題外。今將前項緣繇合咨前去。煩爲查照施行。等因。到臣。案查先准巡撫保定都御史鄭重咨稱。合無將調到兵馬摘撥三千於舊保安州岔道堡駐劄。三千於廣昌縣駐劄。三千於平刑關駐劄。專備應接。

馬水口浮圖峪插箭嶺吳王口等處緣繇前來該臣
看得平刑地方隸山西保安地方隸宣府廣昌地方
軍衛隸宣府有司隸大同已經備行各該撫鎮等官
從長議處俱未回報止據各鎮陸續將分布過人馬
數目呈報前來查得平刑關已有山西潞安叅將李
忠統領官軍三千員名在彼駐劄防守外其廣昌保
安二處並無分布人馬今准前因爲照保定前任巡
撫鄭重咨要摘撥別鎮客兵三千駐平刑三千駐廣
昌三千駐保安岔道堡今巡撫蘇祐咨要摘撥大同

兵三千駐平刑、別鎮兵三千駐廣昌、宣府兵三千駐保安、桃花堡。雖其所見微有不同，要皆思患預防，慎固疆域之意。設若兵力有餘，照前屯布，厚爲之備，實不爲過。惟其兵有定數，恐不免於顧此失彼。要當度勢量力，爲之處分。查得嘉靖二十一年調到別鎮客兵共十枝，二十二年并二十三年客兵共六枝，今歲客兵僅四枝。又准兵部咨爲修關隘屯兵馬以重京師，以因畿輔事。該本部題奉 欽依。已將遼東遊擊郭都官軍一枝三千員名調駐懷來，止存三枝專備。

策應宣大山西地方延袤千有餘里。就中可屯人馬。扞外固內。較之平刑廣昌保安。尤稱要害者尚多。若儘將客兵三枝。分布前項三處。稽之成規。參之羣謀。度之事勢。恐有弗便。况別鎮客兵止空於適中之地。蓄力揚威。聽候臨時調度。隨賊向往。相機截殺。難以拘於一定。若畫地而守。則主兵事耳。宣大山西數年以來。主兵擺列。俱沿邊界。不屯駐於腹裏者。謂兵空據險。不空還守。且恐勢分則力弱也。今查山西平刑一帶。既該本鎮屯布主兵人馬。各有分界。似難責之。

大同舊保安地方。去懷來僅百里。懷來既有遊擊郭

懷來東近居庸關保安西近紫荆

都客兵三千人在彼駐劄。可以往來策應。亦難再發

廣昌已在倒馬之西北矣

客兵。廣昌地方與宣府邊界相離遠甚。且無積聚芻

糧。臣愚已行撫鎮等官量摘主兵一枝人馬駐劄蔚

州。及俟臨時。或將延綏客兵一枝移近此地。以便調

遣。芻餉既不缺乏。又可以南扞廣昌浮圖峪等處。北

廣昌即當神箭之隘

援東西順聖川一帶。似為適中。而廣昌隘口仍以本

地壯丁守之。至于應該隨時斟酌。難以預圖者。臣又

豈敢膠柱。致失事機。所慮宣府一鎮人馬器械。先因

主將匪人狼狽太甚極費整擷去歲已致寇啓侮矣
近來節據謀者及投降人口供報賊所覬覦仍在該
鎮雖聲東擊西情難測度而前車後鑒理當亟防况
其地於京師爲近而東路界鄰順天所屬黃花鎮古
北喜峰白羊口等處尤係可通大舉賊路防秋事宐
隸宣府者臣當與鎮巡竭心殫力從長計處不敢怠
廢隸順天者節辰廟算想亦戒嚴似又無待於臣言
者勅下該部速行順天巡撫等官務要於前項黃
花鎮白羊口等處通賊要路比常加謹設備及預選

精銳兵馬一二枝駐劄相應地方。倘遇警報。聽臣從
空調援宣府。庶彼此協謀。緩急可恃。外藩固而京畿
自安矣。

廣儲蓄以備軍需以防虜患疏

防秋
行粮

准該巡撫山西右僉都御史楊守謙咨。爲照防守之
道。必資兵馬。財用之費。空裁冗濫。自嘉靖二十年虜
賊大舉。深入之後。戶部年例之外。發過銀兩。不下數
百餘萬。帑資已耗。兵役無期。若不勾考。裁節費出。無
經將來。勢豈能繼。但據副使劉璧開呈前項防守應

援官軍。百里之外者什伍。百里之內者亦什伍。若將
百里外者。日支料糧。百里內者不支。則防守既同。支
否類異。揆之物情。似有不堪。况軍士月糧。每月折價。
養贍妻子。尚且不足。寧有餘糧。裹帶守邊。使返食
於家。則各有信地。又遠。返近亦八九十里。勢不克前。
人一日不再食。則飢。不三日必逃潰。雖孝子慈孫。豈
能視人飽食。而自枵腹待斃。荷戈守邊。副使劉璽所
謂人心搖動。逃竄數多。亦勢之所必至者也。軍志曰。
師克在和。孔子曰。有國有家者。不患寡而患不均。不

患貧而患不安。又曰。均無貧。和無寡。安無傾。蓋惟均故和。惟和故安。聖有明訓。物理昭然。查得先年虜賊未強。按伏官軍。多不過數百人。久不過三五日。上下分番。更迭出入。且按伏隘口。多係無食場去處。故百里之內。不支糧草。近年以來。虜衆入寇。常號數萬。深入輒一二千里。遂爲擺邊之計。若山西則築牆乘障。殆將千里。畫地而守。動逾數月。比之先年。按伏萬有不同。夫財用固所當節。而兵衆亦不可不和。若不委曲調停。爲通融之計。萬一事體掣肘。遺患地方。雖將

職罪譴亦無益於事矣。查得丫角山迤西至老牛灣，係極邊地方。外即虜巢，防守應援官軍時不可缺。丫角迤東至平刑關共七百餘里，係內邊地方。外有大同障蔽，應援官軍。若烽火嚴明，哨探的確，待有警報，斟酌調遣，亦不遲誤。合將丫角迤西民壯屯夫人等及偏頭叅將守備老營遊擊守備各兵馬一遇防秋，即行赴邊，兵馬俱支，行糧草料。丫角迤東民壯屯夫人等及寧武總兵代州叅將北樓遊擊神池利民廣武寧武八角平刑守備各兵馬，遇防秋時，月比丫角

西者量遲十數日赴邊認領信地操演防守之法十

數日若聲息寧帖除民壯屯夫人等常川防守外兵

但能據要害以使策

馬仍回本城操練候各邊報有聲息斟酌緩急赴邊

應何必遠戍窮邊哉惟偵探之卒不可不遠耳

防守赴邊之日方支行糧草料此則比百里之內不

支行糧草料者其省相等而支否均齊人心安帖節

省之計和輯之道可以並行而不悖矣又准巡撫大

同都御史詹榮咨查得大明會典開載成化十五

年令各邊防護修墩燒荒官軍若有百里及五日之

內堪自備糧料者不許關支行糧馬草若五日及百

里之外者聽令關支其遇警截殺探賊按伏官軍不能自帶糧料者並聽隨處關支又弘治二年秦准沿邊各衛所征哨并按伏備堡等項官軍出百里之外者俱日支口糧一升五合都指揮把摠等官日支廩米三升備禦官軍日支行糧一升七合馬料三升草一束在營草料住支看得會典所載蓋爲行兵五日及有警按伏暫往暫來者而言未嘗及防秋久住之軍也即今防秋軍士派定各邊防守頃刻不敢暫離蓋自六月赴邊至九月方回晝夜戒嚴且犒補邊

墻辛苦萬狀。不可勝言。若照前例百里之內者。一槩不給行糧。其勢必使防秋軍士。日每回家。自取飲食。及令各軍妻子。日逐親自負送。若無家屬。憑誰轉輸。脫遇虜賊臨邊。必至誤事。伏乞早爲奏請。查將百里之內。但係修工者。行糧一體支給。不係修工者。如不得已。仍與間日一支等因。據此。職伏睹大明會典所載。防護修墩燒荒。分百里五日內外者。蓋修墩燒荒。約其所住之日不多。故首分百里。隨分五日。又繫堪以自備之說。蓋一人帶所自用者。力之所能備。

五日耳凡請會典律今皆須如此說爾未必不仰給於官也故又曰五日

及百里之外者聽令關支不曰五日而又曰五日及

百里之外蓋百里之外自是應支而加以五日者恐

指百里以內言也又曰其遇警截殺探賊按伏官軍

不能自帶糧料者並聽隨處關支又有變於先意之

意百里五日又非所限矣惟先朝裁定會典之崇

尚未有擺邊之事而緣情立法亦自櫟括即其文意

而可以類推也照得今日擺邊盡將各路馬步官軍

調赴墻下定以分地督以將領點闡以旗牌頭目巡

視以守巡撫鎮。令其不分風雨無間。晝夜披堅執銳。寢甲枕戈。常如虜在目前。兼以葺修墻垣。堆積石塊。擔水造飯。提鈴轉籌。各有責成。蓋無時刻可以摘離者。豈非截殺按伏之類耶。遣行於六月之半。而議掣於十月之終。遑返之間。勅幾半載。尚可計五日之內。外耶。苟行糧不足。取于官。非放歸。令其自辦。則運送付之家人。如放歸也。雖三二十里之近。去歸一日。託以糴買。一日比其赴遄。則又一日。况又有家無擔石。稱貸周資。而竟至泯沒者乎。如運送也。數口之家。出

戍者一人。則轉輸者又一人。未免老稚婦女奔走於窮荒絕塞之下。已非人情。况又有單丁隻身無人可藉者乎。昔周先王之遣戍也。出遣入幣。以鼓其我行不來之勇。以忘其內顧傷悲之情。故曰以佚道使民。雖勞不怨。今軍士執役於邊。已不勝其危苦矣。而又使之謀饔殮慮俯仰。以日隱其戚戚之懷。又安望其奮勇敢愾捐軀赴難乎。且兵無常形。頃刻之間。又有調東以補西。摘近以應遠者。果能隨處分析。而使之無溷亂重冒乎。如軍士同一城堡者。撥付擺邊。自某

墩起至某墩止。有起處不及百里而止處又踰百里者。抑何所區別。而使之一一中理乎。此皆勢之滯碍而不可行者。夫虜營近邊。變詐百出。烏舉豕犇。勢如風雨。如上年鐵裹門馳犯於雨雪之後。威虜堡突至於寅夜之時。一處潰防。則千里之守。置之無用。此邊臣防外之慮也。聚七八萬人於塞下。離家室。遠妻子。穴地爲巢。擐甲爲衣。寒暑之所衝冒。飢餒之所催迫。怨豈在明。變出意外。此又邊臣防內之慮也。計盈縮。省浮費。以節財裕用者。又廟堂經國遠猷也。但情

有所不容已而法當折衷者。惟通其勢之所極窮而預防夫人之所必犯。早爲裁定施行。又據分守口北道右叅議蘇志臯呈稱。查得奇遊各營兵馬。乃散取於諸衛所者。派住地方。難以拘定。設如東駐則迤東者在百里之內。而迤西者在百里之外。應支行糧與否。當以地論。若轉而西駐。則迤西者反近。而迤東者反遠。又或於旬日之間。忽然而屢移。則近者既遠。而迤遠者既近。而又遠。參互不齊。難以稽查。各該官軍。一經派撥。晝夜防守。辛苦萬狀。比與一時有警。暫

發按伏者不同。故百里之內。連年亦一體支給。未有異同。若一旦不給。萬一援引舊規。脫巾告擾。則將何以待之。合無軫念邊方。存卹塞卒。將百里之內官軍。早為奏請。行糧料草。准令一體支給。庶人心事體。俱各妥帖。况與大明會典內載。其遇警截殺探賊。按伏官軍。不能自帶糧料者。並聽隨處關支一節。相合似應施行。各緣繇到。臣案查嘉靖二十四年五月內。准戶部咨。該臣題前事。該本部議擬。起倩屯夫。審果不係在官支糧人數。准與客兵一體支給。其餘雖稱

百里之內中間或有離家六七十里之外齎送頗難者量於附近倉分給與數日後不爲例等因題奉

欽依備咨前來已經通行遵照訖隨據鴈門兵備副使劉壘節呈嘉靖二十四年防秋擺邊官軍雖有不
及百里者然日逐修邊相應查照預陳邊計以備虜
患事理一體支與行糧該臣批行暫准支給宣大二
鎮撫鎮守巡亦以擺守之兵兼備築之役通行關支
未嘗分別百里外內而百里之內間亦有不修邊而
緊給者今嘉靖二十五年臣仍申明戶部原議分別

遠近、履行各撫鎮守巡諸臣、查照施行、諸臣執牒相
與趨趨、而不及百里官軍、每簇譁而撻詆、若將怒臣、
臣復移文查處、不能斷然遏抑其所請求也、然數年
以來、內帑寡積、蠲發太繁、臣每憂之、又恒怪邊臣司
甲兵者、不惜度支、非體國繇公之道、使財若可省而
務爲厚施、則臣亦繆、臣萬萬不取也、臣之心罔非欲
布 上德意、惠養征夫、使各盡其力、而不及於患耳、
伏乞 勅下戶兵二部、將宣大及山西丫角迤西極
邊一帶、防秋擺守官軍夫壯人等、不分百里內外、一

體支與行糧料草、丫角迤東在於百里之內者、遇警赴邊之日方許支給、俱著爲定例、以便遵守、以安邊陲。

軍務疏

宣府官兵

據朔州兵備副使陳燿等呈稱、行據戰鋒信智仁勇嚴五營坐營官都指揮楊鉞、董暘、韓彬、周鏜、李瑋呈稱、嘉靖二十三年二月內、蒙巡撫宣府都御史王儀會同鎮守總兵官郤永、題爲選戰士懸重賞以振作士氣事、該兵部議擬題奉 欽依、備咨該衙門、於宣

府在城并各路城堡原額有馬官軍通事內、挑選勇敢者、各營一千名、共五千員名、編成行伍、立充戰鋒、每名正糧一石之外、加米五斗、并厚懸賞格、分於鎮城三千名、西北二路各一千名、依法操練、遇有警報、當先殺賊、見今各營除逃亡事故外、見在信字營六百一十二員名、智字營八百八十五員名、仁字營九百八十六員名、勇字營九百一十七員名、嚴字營九百四十一員名、各數目緣繇到道、會同鎮守宣府總兵官趙卿、議照宣府一鎮額設正奇遊兵四營、每營

官軍三千員名、團住鎮城專備虜寇、各路亦設有援兵、五營各官軍三千員名、分屯要害、防守地方、統以總副叅遊等官、無事常川操練、遇警徵調防勦、立法不爲不備、頃緣醜虜入寇、議選各營精銳軍士、共計五千員名、別立戰鋒五營、領以廢棄將官、遇警當先殺賊、原其立法本意、似爲添設銳兵、破格作養、冀立奇功、但各營當先殿後、俱應有精銳官兵、據今於奇遊援兵并各城堡之中、抽選充爲戰鋒、所存營伍卒致空虛、而又別取老弱步卒、用充原數、是不免於輕

凡六皆須力戰、獨以戰名、亦非體也。

此而重彼。見任將領。俱懷不平矣。戰鋒每名額外加米五斗。歲費不貲。已爲難繼。而居常散處各路。無所統攝。教練。不過繫名營伍。徒資坐食之弊。漸成驕惰。不堪使用。及遇調遣。殺賊。自謂親兵居後。反驅各路援兵。以爲鄉導。遂致各營軍士。亦皆解體觀望。不肯用命。殺賊矣。用是師久無功。且以三軍之衆。統以廢棄之人。位望旣輕。事權不重。臨敵遇險。亦難望其驅人必死之地。以覬僥倖萬一之功。凡此殊非選將練兵之意。卽今戰鋒五營。逃亡漸多。而奇遊援兵等營。

率皆不滿二千，名伍徒存。彼此俱弊。兵營虛耗，莫此爲甚。萬一遇有警報，緩急其何所恃。合無將前設戰鋒官兵俱革回各路各營。其正奇遊援兵馬有不足三千之數者，俱要補完等因。到臣案查先該臣照得各邊原設正奇遊援軍兵俱應有戰鋒並無另設。獨宣府一鎮於正奇遊援之外又有戰鋒五營。恐非兵制亦難責効。已經節行各道會同分守道備查前項戰鋒設于何年。有無便利。應否革罷散歸各路各營。隨征殺賊。逐一從長計議。通呈定奪去後。今據前因

臣會同巡撫宣府右僉都御史孫錦議照宣府一鎮額設正兵一營。主將領之。奇兵一營。副將領之。遊兵二營。兩遊擊領之。援兵五營。五叅將領之。而各路城堡。又有守備操守等官。所轄兵馬。自副叅而下。皆統於主將。其制甚備。而其法亦甚善也。近年添設戰鋒五營。各領以廢棄將官。戰鋒每名月糧一石。另加米五斗。蓋前此巡撫王儀總兵官郤永爲之者。非舊制也。委應亟處以復兵額之舊。如各道之所議呈者。今之戰鋒。即古之所謂選鋒也。兵無選鋒。曰北。故恃以

一軍之內必有選鋒所

當先破敵者非此不可。然正奇遊援諸營皆空有之。

虎士奇勇別為構募如逆者家丁之例可耳若抽版

未聞於諸營之外別為戰鋒五營又於諸營各城堡

於各營之中墮軍突而生視壁甚非便也

之中抽取其勇力冠軍者隸於他人而使所存留者

多弱兵也。夫鋒之為言銳也。以缺為刃而以鋼為鋒。

則物迎而解。若鋼不附鐵鐵可去鋼未有成刃而能

銳於用者也是不可不亟處者一也。總副叅遊各躡

推陞又奉有勅諭旗牌設有坐營中軍把總等官。

苟不得人尚不能和輯師徒鼓作銳氣乃廢棄將官。

第當令帶家丁或量其才能暫行撥與軍兵隨營殺

賊不宐專主一營事務。使得與叅遊諸將並列。而委用之隆。反出乎其上。此亦何怪諸將舐舐懷不平邪。夫將多則權分。兵家所忌也。分其權於廢棄之人。即其人果木。猶且非法。况貪濫庸劣。如見管營都指揮董暘、李瑋等。何可使也。查得董暘、李瑋及已陣亡官李彬、已陞守備官張忠、見革回衛官江瀚、五員俱前撫鎮所薦用者。彼時除李瑋原係把總陞爲坐營外。李彬係閑住。董暘係緣事。張忠、江瀚係充軍。因添戰鋒爲請免罪。各復原職。蓋破格用人。寧失不經之意。

也。各官復職領兵之後，使知奮勵，樹有奇勲，尚可言也。而往者虜犯廣昌，困我軍於土黃溝，李彬死焉。董賜等俱坐視不救，仍許戴罪管營立功，旋又再復原職，是前罪未贖，而先官之後，罪愈重而竝釋之，乃竟未聞有感。恩而思報者，謂之何哉。今查戰鋒營舊者唯董賜、李瑋二人，其都指揮周鐘、韓彬、楊鉞皆新委代管，視之蔡遊等官有勲，勅諭旗牌者孰輕而孰重。蔡游等官不得有戰鋒之選，而此輩乃獨擅專營之權，揆之事體，委的未安。何者？本鎮兵馬止有此數

以杜下弄，委特選，共一脈，可也。委之常擁，精卒使任事者，解體。甚非制耳。

戰鋒五營五千人。必欲取足。則叅遊諸營及各城堡。自難充實。奪此以與彼。廢兵額而啓厲階。是不可不亟處者二也。戰鋒官兵。一遇警急。既自謂親軍居後矣。而奇遊援兵諸軍。却又有辭。往往相聚言曰。上官抽選戰鋒。以其與衆軍異也。乃厚待之。月加米五斗。彼不向前殺賊。而使我衆當先。厚彼何爲。是戰鋒之營立而諸營之軍靡矣。是不可不亟處者三也。戶部原發銀二萬兩。爲戰鋒月加米五斗之用。今前銀已罄。無所於處。戰鋒亦止月支米一石。官多而役使重。

繁勢所必至。甚有令其供辦新水。迎送違來。又從而剝削之者。疲敝日甚。逃亡日多。馬匹倒死。亦莫勝計。誠以廢棄之人。往往得脫法網。無所忌憚。自難責以治軍事也。是其不可不亟處者四也。爲今之計。必須罷歸各路。補充舊額。使兵力不分。事權歸一。營營皆有戰鋒。而戰鋒不爲虛名。方是事體。否則弊害相乘。將無紀極。如蒙乞。勅兵部查議。將前五營戰鋒官兵。俱各革回各營。及各城堡。仍將正奇遊援各營見操官軍中間老弱不堪者。盡行沙汰。查照所轄地方。

於革回前項戰鋒及城操雜差等項中間通融選補。每營務足三千員名。悉聽總兵官調度。及嚴督副叅遊守等官時加訓練。果有勇力出衆。曾經戰陣者。充爲選鋒名色。厚加賞犒。務期人各効能。兵皆可用。及咨都察院轉行巡按御史查勘董場李塘與革回江瀚及陸任張忠節年以來曾在某處與賊對敵。立有何項功績。有無剝削軍士糜費錢糧。倒死馬匹等項情弊。如可自贖者准贖。如不可贖。原犯充軍者照舊充軍發遣。緣事者查照原案叅提。所犯事情。比前若

又加重者。從重歸結。其新委坐營周鏜。楊越。韓彬。各革回別用。庶事無紛更。罪無倖免。邊防國法。兩有所裨矣。

易州議罷抽民兵疏

罷抽民兵

臣伏見直隸八府所屬近奉抽選民丁之令。大縣五百小縣三百。分營列隊。如軍之制。選官差練。遇警徵發。此非小事。臣竊以爲甚不可焉。何也。夫國依於民。民依於國。是謂命脉。兵以衛民。民以養兵。是謂典章。圖治者。貴于動以其耑。而馭不失道。間閭輸賦。卒伍

荷戈則典章較一而不亂。惠寧畿服以及四方。則命脉安固而不搖。若勢失於張皇。不問其當否。則拂擾交至。怨讟易生。潰亂將作。是蓋古人所謂未見其隙之民心者。臣竊懼焉。我國家制軍一隸於衛所。原無所謂民兵也。民兵如快手民壯之役。起於近年。本以協守城池。非得已者。然既出稅以養兵。乃又使為兵而自衛。則已困矣。顧重復之以抽丁之令。何能堪邪。抽丁之令。其始止於邊鎮衛所。既而乃及於畿輔之民間。臣竊以邊鎮衛所。猶於時勢為便。而民間則

民兵之始設。皆於防本境。必不徵調。然其後必至千徵萬況。先有發遣之令。耶

急當罷請以圖靖安。蓋邊鎮之兵。陛下已允其選。調則隊伍空虛。邊防重大。其勢不得不補。又生長於塞下者。習知戰鬪。素亦可用。令抽強勇以足兵額。其法未始不善也。不然。精銳內移。孰爲防禦。門戶旣撤。堂奧自孤。如之何其能守邪。臣竊以爲便者此也。但選而調者一人。抽而補者又一人。是本以一兵而增二人也。兵額旣增。糧將安出。增兵一萬。則月加糧米一萬事。或倉卒。勢難猝辦。卽高其價。無從糴買。此又不可以不慮也。若畿輔之地。邇者督臨之官屢殷。往

來之使不絕。既責之完納。逋負矣。又責之分買草糧。賠易馬匹矣。又責之幫貼募軍。供辦器物。添設墩堡。修築邊牆。此其於事不可謂不繁。於民不可謂不擾也。然而閭里帖然。不敢以爲言者。固曰。特以禦虜而安全我也。而今乃抽及戶丁。則一人之身。百役叢集。一戶之衆。強半在官。遠邇咸相顧失色。且曰。吾出稅以供軍。以其爲我捍禦也。顧皆倚戈而立。據城而居。而去歲之死傷枕藉。妻孥係虜者。則皆民也。而今乃籍丁而選。聯門而出。寧非驅我以爲先耶。人情驚駭。

不謀同詞。蓋今之充軍者。罪下死囚一等。抽丁聽調。一如軍制。安得不驚。又戎狄以騎射爲業。攻擊爲俗。中國農民。雖授以兵械。教之擊刺。止可依城堡而守。若必使之禦虜。是驅羣羊而戰豺狼。鮮不誤事。况衣糧鎧甲之費。追呼迫脇之擾。卽將盡鬻田地。妻孥以充之。而後已。猶懼其不能也。臣恐衆心一離。不可復收。故竊以爲甚。不可者此也。方今天下無故。惟有虜寇爲患。雖虞周之盛。在所不免。但當明察人心。預定國是。聚兵守要。而不妄增兵。經費足邊。而必裁冗費。

則先事之謀在我。已得其勝算矣。若人持其見。則議論太泛。事體具舉。則更張太驟。官多其設。則供億太繁。齟齬太甚。忽焉而行。忽焉而罷。忽焉而罷。又忽焉而行。如此。則我自多事。是爲坐困。故臣惟天下之患不專於外夷。而其大者。則莫若抽民丁之令。伏乞早賜停止。庶民心無恐。而畿輔可安。地方幸甚。

聲息疏

宣府零寇

臣看得滴水崖兩次失事。雖經該道勘報。而虜入緣繇前後尚仍未悉。各官罪狀輕重。亦欠相當。欲候駁

勘至日，叅題處治，不無稽遲。敢先以臣所聞見者言之。前項侵擾滴水崖永寧川之寇，支係朶顏支部，散處於宣府東北路邊外。亂山叢樹之間，善伺竊如狗鼠然，貳於大虜。且能盜大虜馬牛。大虜怒，則竄伏林石，或依我險塞，莫之能追。往年該鎮曾兩搗巢，獲功受賞。及去歲龍門所之役，敵殺官軍。即此賊也。計不能千人。設使我軍屢襲為功，逼之太甚，勢弱不能自為我耳目急之必為彼嚮道空撫不空剿可謂瞭立。將必投併大虜。為彼嚮道地方愈益多事。費於支然而邊臣無欲無勦者以其兵力弱易于報功也吾。以故識者欲循故事，設法撫處，不以羈縻使其為

近邊小虜窺之賊

我藩籬。爲我閒謀。截大虜之衝。省目前之慮。似亦計之善者也。臣自去冬。今春。每以語當事之臣。當事之

臣多持謙論。而叅將祁勛左瀨等。亦遂妄說利害。稟

此亦大毒

報紛紜。大略謂禦之不難。撫之無便。臣度不可與共

恐不宜漫然聽之

圖也。姑責各官禦之而已。豈意各官徒爾能言。玩不

設備。致使前賊輒肆。憑陵。是先既不肯撫。而今復不

能禦。無一可者。安用彼爲。賊入之後。節據總兵官趙

卿叅將祁勛。屢請軍門。另發兵馬。臣惟北路馬步管

軍。共計一萬一千有奇。今秋盡數存留。不復西調。隨

宐分布。儘足自防。各路官軍。調度得宐。亦敷應援。固無待於客兵也。其所調客兵。蓋專爲大舉策應計耳。零賊多不過五六百騎。乃亦仰藉於此。揆之兵略。甚非所宐。

置造火器疏

火器

臣愚管年官粵中。每因用兵。參攷古火器。而病其制之多已不傳。即有傳者。又病其重難不易用也。于是殫竭愚慮。因舊創新。粗備而未試。比來宣大仍加參考。見今造成有所謂三出連珠砲。百出先鋒砲。鐵棒

雷飛砲、火獸布地雷砲之四種者，連珠砲蓋古制也。古砲之制，固非善而有宐不宐，稽之古礮者，機石也。用機運石而飛之，致遠爾。後以火藥實銅鐵中，亦謂之礮。至如神機火鎗，用鐵爲矢鏃，火以發之，可飛百步之外，皆制之巧者。然皆一發而止，倉卒無以繼之。敵知其故，或出於巧智以爲避就者，未必無也。神機則又苦著矢之難，稍不如法，則不能及遠，卒不練習。用之惟艱，連珠砲其制如神機式，其長倍之。每杆三分之，以次實藥，發亦如之。一具而三出，有連續之妙。

虜或避而就之。適當後發之衝。人可持放。不甚苦其難。此古制之尤巧。而宐於用者。邊人不能知。乃考而作之。與神機諸砲竝焉。先鋒砲。倣佛郎機砲。而損益之也。火器莫利於佛郎機。大率筒長三尺有奇。而小砲則止于五。夫筒之長。以局其氣。使發之迅也。小砲伍以錯其用。使迭而居也。先鋒之制。則損其筒十分之六。狀若神機。而加小砲。以至於十。曰氣可局。而用不使有餘也。砲可錯。而用不使不足也。用則繫火繩。砲必用子母者。以砲當初發。為熱不便于裝藥也。於筒外。而納火砲於筒內。畢即傾出之。連發連納。十

砲盡則更爲之循環無間斷也。筒仍酌其處鑿通一

機轉動消息。倒擊不流。傾卸不碍。未有銳鋒如戈形

近者三眼鎗別亦如此

無耳長六寸。以代鍬鎗之用。遠擊近刺。其用博矣。夫

佛郎機之爲器也。昇之者四人。臨發持者一人。放者

一人。是六人發五砲也。况火露筒外。出刺人手。安砲

或離于度。則暴裂反傷。非善用者。昔臨驚懼。心志不

定。高下無準。先鋒砲持放者一人。不必布機於地。即

馬上亦空之。是一人發十砲也。况火納筒中。即不必

善用者。心志不懼。高下可準矣。假如三千營中。每伍

內一人執一筒十砲百彈子。則一伍常有十佛郎機。且兼十鎗矣。十伍十人執十筒百砲千彈子。則一隊當有百佛郎機。且兼百鎗矣。六十隊六百人執六百筒六千砲六萬彈子。則一營當有六千佛郎機。且兼六百鎗矣。蓋一人所執。不啻往時十餘人所執者。斯不亦簡而便邪。雷飛砲。倣毒火飛砲而少爲之變者也。砲之先。鍛鐵爲筒。磨石爲子。已矣。一變而爲毒火飛砲。鎔鐵爲子。虛其中而實之藥。擊處皆傷。蓋傳自前代。而兵家頗秘之。然毋砲重大難於舉移。故以之。

擊大營守城垣可也。賊散而來迎而拒之。且馳且戰。則非所及矣。于是再變之。約其子砲而輕其母砲。約之使易飛輕之使易持也。母砲則約長尺許。上廣下窄。下如神機之狀。上盤菱花之形。其法雖略本飛砲而輕重別矣。敵遠則用之以衝擊。或至空而震。或至地而震。或中人馬而震。鐵物之所斃。擊無不摩爛者。敵近則揮之爲鐵棒。連鎧甲而搥撻之。當無不退怯者。人持一具。可以攻。可以守。與毒火飛砲功同而用異。蓋守之砲貴重大。戰之砲貴輕小。守則不離。次而

近○者○此○洋○大○也○必○築○社○祀○等○上○物○亦○以○竹○香○故○也○價○於○

○乘○障○不○便○於○野○戰○。○易○施○重○大○得○力○也。○戰○則○屢○易○次○而○難○施○。○輕○小○得○力○也。○布○地○雷○砲○。○倣○田○單○火○牛○之○意○而○增○之○以○砲○火○者○也。○田○單○以○火○牛○取○勝○。○然○止○束○刃○牛○角○。○今○虜○黠○猾○善○避○營○疎○野○濶○。○不○可○以○觸○傷○。○惟○得○火○砲○布○擊○之○。○斯○使○之○震○攝○。○若○乘○夜○用○之○爲○尤○得○策○。○因○其○亂○而○砍○其○營○。○蔑○不○勝○矣○。○而○用○必○馬○羸○。○以○其○性○犇○健○。○可○以○代○牛○。○火○砲○之○發○迅○烈○。○比○于○刃○遠○矣○。○是○故○剝○木○爲○桶○。○闢○之○翕○之○。○長○一○尺○有○五○寸○。○圍○四○寸○。○火○砲○繫○焉○。○火○線○通○焉○。○略○如○毒○火○飛○砲○法○。○然○其○繫○之○也○。○有○機○。○其○通○之○也○。○有○候○。○匪○機○則○無○脫○略○之○功○。○匪

候則無疾徐之節。抵其機則欲連而易斷也。抵其候則欲準而不愆也。桶一而繫砲七。獸一而負桶六。計一獸之所負。則火砲四十有奇。十獸之所負。則火砲四百有奇。若用區箱以代桶。尤便。雷布而電發。須臾之頃。遍以原野。必有以奪敵之氣。或爲馬羸之性。驚則橫逸。不能使之直衝。故用砲易而用獸難。臣惟水可過。穎在山。搏擊之勢使然爾。而况馬羸之有知覺。運動者。或機而制之。或因地勢而驅之。或遣間而引之。或得賊馬而縱之。臨時之宜存乎其人。則亦無不

可用也。以上四者俱當預備。而百出先鋒砲則尤火
器之最便利者。古制未嘗有也。自古謀臣智士較論
中國夷狄之長技。如晁錯所稱匈奴惟善馳射。固未
聞其有中國之堅甲利刃者也。乃今北虜則甲刃精
好。中國弗能當矣。數年之前。我軍與虜鬪。兵刃既接。
輒以骨朶狼牙棒槌撻虜。虜刃短不相及。間為中國
所制。乃去年虜犯陝西之保安。亦安狼牙骨朶。而中
國或弗能當矣。若神機槍佛郎機銃毒火飛砲等項
之想不如中國之精耳。昔我叛人為之也。

近日東奴亦有

火器則夷狄所絕無。亦其所駭懾者。今日中國之長

技獨擅此耳。邊人苦其難，而未能盡其用。臣是以欲
教之以輕便。如先鋒砲者，委不可缺。其餘則量爲置
造可也。